

**BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM**

Broj: 01-02-94/99.

Datum: 15.07.1999.g.

Z A P I S N I K

**SA 7. SJEDNICE PREDSTAVNIČKOG DOMA PARLAMENTARNE
SKUPŠTINE BOSNE I HERCEGOVINE, ODRŽANE 15.07.1999.G.**

Sedma sjednica Predstavničkog doma počela je sa radom u 13,35 sati. Predsjedavao je dr Halid Genjac, predsjedavajući Predstavničkog doma.

Na početku sjednice predsjedavajući je konstatovao da sjednici prisustvuju 34 poslanika - 21 sa područja Federacije BiH i 13 sa područja Republike Srpske. Naknadno su se radu sjednice pridružila još dva poslanika (sa područja Federacije - g. Edhem Bičakčić, te g. Ljubomir Zovko, kojem je kasnije verifikovan mandat), pa je sjednica radila sa 36 poslanika. Prema tome, Dom je imao kvorum za punovažan rad i odlučivanje.

Prije prelaska na utvrđivanje dnevnog reda dr Genjac je informisao poslanike da je, povodom inicijativa poslanika za održavanje tematskih sjednica o evropskim integracijama i Paktu stabilnosti za Jugoistočnu Evropu, na Kolegiju dogovoreno da se povodom ovih pitanja sjednica Doma održi 22. jula, te da se u pripremi te sjednice prije održe sjednice svih radnih komisija i sjednica Kolegija. Zatim je predložio dnevni red 7. sjednice koji je usaglašen na sjednici Kolegija, kako slijedi:

1. Usvajanje zapisnika sa 6. sjednice Predstavničkog doma,
2. Odgovori na poslanička pitanja,
3. Verifikacija mandata poslanika,
4. Prijedlog zakona o administrativnim taksama,
5. Razmatranje i usvajanje Zakona o državljanstvu BiH,
6. Zakon o grbu BiH,
7. Prijedlog izmjena i dopuna Zakona o putnim ispravama BiH,
8. Prijedlog odluke o utvrđivanju kompleksa zgrada i zemljišta za smještaj institucija BiH, o njihovom statusu, uslovima i načinu korištenja,
9. Prijedlog odluke o utvrđivanju statusa zgrade i zemljišta u Ul. M. Tita 25. i uslovima i načinu za njihovo korištenje,

10. Davanje saglasnosti za ratifikaciju:

- a) Sporazuma o razvojnom kreditu za projekat osnovne zdravstvene zaštite između BiH i Medjunarodne asocijacije za razvoj,
- b) Sporazuma o razvojnom kreditu za Pilot-projekat lokalnog razvoja između BiH i Medjunarodne asocijacije za razvoj,
- c) Sporazuma o razvojnom kreditu za prilagodjavanje u privatizaciji preduzeća i banaka između BiH i Medjunarodne asocijacije za razvoj,
- d) Sporazuma o razvojnom kreditu za strukturalno uskladjivanje javnih finansija između BiH i Medjunarodne asocijacije za razvoj,
- e) Sporazuma o razvojnom kreditu za projetak podsticanja izvoza preduzeća između BiH i Medjunarodne asocijacije za razvoj,
- f) Sporazuma o razvojnom kreditu za Pilot-projekat kulturnog nasljedja;

11. Prijedlog zaključaka o djelokrugu radnih komisija Predstavničkog doma, rokovima i prisustvu predlagača,

12. Poslanička pitanja.

U diskusiji povodom prijedloga dnevnog reda učestvovali su: Ibrahim Spahić, Bogić Bogićević, Sejfidin Tokić, Zlatko Lagumdžija i Tarik Čaršimanović.

Poslije diskusije predloženi dnevni red je usvojen sa 28 glasova (16 sa područja Federacije BiH i 11 sa područja Republike Srpske – jedan poslanik nije glasao prilikom izjašnjavanja po entitetima). šest poslanika je bilo uzdržanih.

Nakon usvajanja dnevnog reda predsjedavajući je stavio na glasanje prijedloge iznesene u raspravi povodom prijedloga dnevnog reda, a odnose se na pripremu sjednice o evropskim integracijama i Paktu za stabilnost u Jugoistočnoj Evropi.

Usvojeni su sljedeći prijedlozi:

1. da ministar inostranih poslova g. Jadranko Prlić na početku ove sjednice podnese kraću informaciju o dosadašnjim pripremama za održavanje Samita o Paktu stabilnosti u Sarajevu;
2. da se od Predsjedništva BiH, Savjeta ministara i parlamentarnih komisija u Savjetu Evrope i OSCE-u zatraže informacije koje su bitne za pripremu sjednice Parlamenta koja će biti posvećena ovoj temi, te da radne komisije održe svoje sjednice i pripreme svoj prilog narednoj tematskoj sjednici (za ovaj prijedlog glasalo je 30 poslanika).

Vežano za prijedlog gospodina Sejfidina Tokića da Kolegij pripremi program rada Predstavničkog doma i da Savjet ministara pripremi prijedlog

zakona o imigraciji i azilu, zakona o Vijeću ministara i zakona o carinskoj službi BiH, u diskusiji su učestvovali Ibrahim Spahić i Vito Rakić. Zatim je predsjedavajući prijedlog stavio na izjašnavanje.

Za ovaj prijedlog glasalo je 15 poslanika, a 16 se uzdržalo od glasanja.

Predsjedavajući je konstatovao da prijedlog nije usvojen.

Gospodin Bogić Bogičević je predložio da se na ovoj sjednici raspravlja o paktu o stabilnosti i da se sačini spisak obaveza koje je na temu približavanja evropskim integracijama dužan da uradi Parlament.

Zlatko Lagumdžija je imao više prijedloga, ali je od većine odustao. Ostao je pri prijedlogu da se za 15 dana nakon Samita održi sjednica Parlamenta za koju će Predsjedništvo, Vijeće ministara i Parlamentarna delegacija u Vijeću Evrope pripremiti odgovarajuće dokumente - program realizacije Madridske deklaracije, program prijema BiH u Vijeće Evrope, sa zaduženjima i realizacije onoga što proizilazi iz Pakta o stabilnosti.

Gospodin Mirko Banjac je sugerisao da je za pripremu predloženog kratak rok od 15 dana, a gospodin Bičakčić je obavijestio poslanike da Parlamentarna delegacija u Vijeću Evrope već ima gotov program.

Poslije diskusije predsjedavajući je predložio sljedeći zaključak:

Sve što je spremno u vezi sa ovom temom da bude na dnevnom redu sjednice zakazane za 22. juli, a sve drugo što nije spremno, Parlamentarna skupština će zahtijevati da se pripremi u roku od 30 dana, što će biti predmet tadašnjeg zasjedanja.

Za prijedlog je glasalo 25 poslanika, a 5 se uzdržalo. Po entitetima - 19 poslanik sa područja Federacije BiH i 6 sa područja RS je glasalo ZA. Predsjedavajući je konstatovao da je zaključak usvojen.

Poslije usvajanja zaključka diskutovao je g. Nikola Špirić, nakon čega je nastavljen rad Doma po usvojenom dnevnom redu.

Ad - 1: Usvajanje zapisnika sa 6. sjednice **Predstavničkog doma**

Primjedbu na zapisnik iznio je g. Zlatko Lagumdžija, istakavši da je na str. 4. pod Ad - 6. pogrešno navedeno da Nacrt zakona o osnivanju zajedničkih policijskih snaga za suzbijanje terorizma, medjuentitetskog kriminala i neovlaštene trgovine drogom nije dobio potrebnu većinu. Naglasio je da treba navesti da je Nacrt zakona dobio nadpolovičnu većinu, ali da nije dobio potrebnu entitetsku većinu, te da zbog toga ide na usaglašavanje.

Predsjedavajući dr Halid Genjac je, u vezi primjedbe poslanika Lagumdžije na zapisnik, istakao da su u momentu glasanja o Nacrtu zakona bila prisutna 33 poslanika, te da prema tome 15 glasova ZA ne predstavlja nadpolovičnu većinu prisutnih. Zato je predložio da Komisija o ustavnim i pravnim pitanjima, zajedno sa Sekretarijatom, prema stenogramu 6. sjednice, ustanovi stanje oko glasanja o spornom Nacrtu zakona, a da se primjedba g. Lagumdžije konstatuje zapisnički.

Povodom prijedloga ovog zaključka diskutovao je g. Sejfidin Tokić, a replicirali su mu Halid Genjac, Edhem Bičakčić i Neven Tomić.

Nakon dalje replike između g. Tokića i Tomića, Zapisnik sa 6. sjednice Predstavničkog doma je usvojen, uz zaključak da Komisija o ustanvima i pravnim pitanjima, zajedno sa Sekretarijatom Parlamentarne skupštine, prema stenogramu 6. sjednice utvrdi stanje oko glasanja o Nacrtu zakona o osnivanju zajedničkih policijskih snaga za suzbijanje terorizma, međujentitetskog kriminala i neovlaštene trgovine drogom, te da o tome obavijesti Predstavnički dom.

Za Zapisnik, uz zaključak, glasala su 24 poslanika, a 5 je bilo uzdržanih.

Ad - 2: Odgovori na poslanička pitanja

Povodom odgovora na poslanička pitanja govorili su Ibrahim Spahić, Ana Havel, Vito Rakić i Suada Muminagić.

Ad - 3: Verifikacija mandata poslanika

Predsjedavajući dr Halid Genjac je obavijestio poslanike da je od Hrvatske demokratske zajednice, uz saglasnost Privremene izborne komisije, dostavljen prijedlog da se mandat poslanika u Predstavničkom domu, umjesto pokojnog Joze Leutara, dodjeljuje slijedećem kandidatu sa liste HDZ, gospodinu Zovko Ljubomiru.

Zatim je gospodin Zovko Ljubomir je pristupio činu davanja svečane izjave.

U okviru ove tačke dnevnog reda gospodin Neven Tomić je obavijestio Dom da je Predsjedništvo Hrvatske demokratske zajednice prihvatilo zaključak o nespojivosti funkcija izvršne i zakonodavne vlasti, te je zbog toga najavio da će poslanici iz reda HDZ, koji obavljaju izvršne funkcije, g. Tomić i Prlić, do kraja ovog mjeseca donijeti odluku o opredjeljenju za jednu od funkcija koje obavljaju.

Ad - 4: Prijedlog zakona o administrativnim taksama

Izveštaj Komisije za finansije i Budžet o razmatranju Prijedloga zakona o administrativnim taksama podnio je g. Nikola Špirić.

U raspravi su učestvovali Nikola Špirić, Edhem Bičakčić, Suada Muminagić, Neven Tomić, Alma Čolo i Mirko Banjac.

Poslije rasprave potpredsjedavajući Vijeća ministara izvijestio je Dom da je Vijeće ministara prihvatilo amandmane g. Alme Čolo na čl. 10, 19. i 25, kao i amandmane g. Suade Muminagić na čl. 7. i 30. Takođe je izvijestio da je Vijeće ministara prihvatilo i amandman delegata u Domu naroda g. Mirsada Ćemana na čl. 25, dok amandmani 2. i 3. g. Ćemana nisu prihvaćeni.

G. Tomić je naglasio da Vijeće ministara nije u cjelosti prihvatio ni amandman Komisije za finansije i Budžet koji se odnosi na naziv zakona, ali da se

prihvata kao inicijativa i da naziv zakona ostane "Zakon o administrativnim taksama".

Što se tiče amandmana g. Nikole Špirića, da je sporan ustavni osnov za donošenje ovog zakona, g. Tomić je konstatovao da za donošenje zakona postoji ustavni osnov i da smo se za to i prije opredijelili kod donošenja Zakona o Budžetu BiH, gdje je predviđeno da će se ove godine ubrati 20 miliona maraka od administrativnih taksi.

Poslije izlaganja potpredsjedavajućeg Savjeta ministara, Nevena Tomića, predsjedavajući dr Halid Genjac je konstatovao da su amandmani koje je Vijeće ministara prihvatio postali sastavni dio prijedloga zakona. Zatim je dao na izjašnjavanje Prijedlog zakona o administrativnim taksama.

Za Prijedlog zakona, od 31 prisutnog poslanika, ZA su glasala 24, a 10 poslanika je glasalo protiv.

Prilikom glasanja po entitetima Za predloženi zakon glasala su 3 poslanika sa prostora Republike Srpske.

Predsjedavajući je konstatovao da Prijedlog zakona nije dobio potrebnu entitetsku većinu, radi čega će se obaviti usaglašavanje na Komisiji Kolegija.

Ad - 5: Zakon o državljanstvu Bosne i Hercegovine

Predsjedavajući je podsjetio poslanike da je Zakon o državljanstvu na prethodnoj sjednici dobio većinu prisutnih poslanika, ali nije dobio neophodnu većinu sa prostora Republike Srpske, te je podsjetio na dalju proceduru. Naglasio je da je Kolegij Doma imao sjednicu u svojstvu Komisije i da nije postignuta saglasnost o Zakonu.

Poslije uvodnog izlaganja g. Genjca, zamjenik predsjedavajućeg mr Mirko Banjac je, u diskusiji, pored ostalog, naglasio da su poslanici iz reda srpskog naroda iz Republike Srpske tražili da se donese odluka o uslovima sticanja dvojnog državljanstva, što je u skladu s Ustavom Bosne i Hercegovine. Rekao je da je prihvatanje te odluke uslov da srpski poslanici iz RS glasaju za Zakon o državljanstvu, a da nemaju primjedbi na Zakon. Kao kompromisno rješenje predložio je da se glasa u paketu o Zakonu i o prijedlogu odluke.

U diskusiji su učestvovali: Alma Čolo, Mirko Banjac i Rasim Kadić.

U ime Vijeća ministara kopredsjedavajući Svetozar Mihajlović je obavijestio poslanike da na Vijeću ministara nije postignuta saglasnost oko teksta predložene odluke, pa da prema tome nema ni stava Vijeća ministara.

U daljoj diskusiji učestvovali su Mirko Banjac, Alma Čolo i Adnan Jahić.

Poslije diskusije predsjedavajući je prvo stavio na glasanje Zakon o državljanstvu.

Od 32 prisutna poslanika za Zakon je glasalo 18.

Zatim je obavljeno glasanje po entitetima.

Sa prostora FBiH glasalo je 15 poslanika, a sa prostora RS 3.

Predsjedavajući je konstatovao da je Zakon dobio većinu prisutnih, ali da nije dobio neophodnu entitetsku većinu, te da je potrebno ostvariti usaglašavanje na Komisiji. Zatim je pozvao poslanike da se izjasne o prijedlogu odluke.

Povodom prijedloga odluke, koji su podnijeli srpski poslanici iz RS, dalje su diskutovali Ivo Divković i Mirko Banjac, a potom je obavljeno glasanje.

Za prijedlog odluke glasalo je 10 poslanika, 12 je glasalo protiv a 12 se uzdržalo.

Predsjedavajući je konstatovao da prijedlog odluke nije dobio većinu prisutnih.

Dr Halid Genjac je zatim rekao da bi trebalo glasati o prijedlogu poslanika Adnana Jahića, koji je predložio da se Predsjedništvu BiH uputi sugestija da pristupi izradi platforme za bilateralne razgovore o dvojnem državljanstvu između BiH i Jugoslavije, odnosno BiH i Hrvatske.

Povodom ovog prijedloga diskutovao je Sejfidin Tokić, a njegova diskusija je izazvala repliku Jahića i Banjca, te je poslije ponovo govorio Tokić. Dalje su u diskusiji učestvovali Jadranko Prlić i Rasim Kadić.

Poslije diskusije predsjedavajući je konstatovao da su u sali prisutna 33 poslanika, pa je prijedlog zaključka dao na glasanje.

Za prijedlog je glasalo 15 poslanika, 10 je glasalo protiv, 8 se uzdržalo. Prema tome, prijedlog nije dobio potrebnu većinu prisutnih.

Ad - 6: Zakon o grbu Bosne i Hercegovine

Predsjedavajući je podsjetio da je i ovaj zakon bio na usaglašavanju na Komisiji Kolegija i da nije postignuta saglasnost u vezi čl. 4. Zakona o grbu.

Diskusovao je g. Mirko Banjac, a potom je predsjedavajući Zakon stavio na glasanje.

Za Zakon je glasalo 18 poslanika, 10 je glasalo protiv, a 4 su se uzdržali.

Kod glasanja po entitetima za Zakon je glasalo 15 poslanika sa prostora FBiH, a 3 sa prostora RS, dok je 10 poslanika sa prostora RS glasalo protiv.

Predsjedavajući je konstatovao da je više od 2/3 poslanika sa područja RS glasalo protiv, te da Zakon nije usvojen.

Ad - 7: Prijedlog zakona o izmjenama i dopunama Zakona o putnim ispravama

Predsjedavajući dr Halid Genjac je podsjetio da je u pitanju Prijedlog zakona koji su podnijeli poslanici Sejfidin Tokić i Ivo Divković, te da je isti također na prošloj sjednici dobio većinu prisutni, ali ne i entitetsku većinu, radi čega je bio na usaglašavanju na Komisiji Kolegija. Naglasio je da se Komisija Kolegija nije usaglasila ni oko ovog prijedloga zakona, ne zbog sadržaja Prijedloga zakona nego zbog činjenice da je Vijeće ministara pripremilo Zakon o izmjenama i dopunama Zakona o putnim ispravama BiH, kojim će, pored ostalih, tretirati i pitanje koje je bilo predmet usaglašavanja.

Gospodin Abdurahman Malkić, predsjedavajući Komisije o pitanjima ljudskih prava, imigracije, izbjeglica i azila, obavijestio je Dom da je ta komisija razmatrala Prijedlog zakona i da je većinom prisutnih članova Komisije (4 za i 1 protiv) isti podržala.

U diskusiji su učestvovali Ivo Divković, Sejfudin Tokić, Ana Havel, Miodrag Deretić i Rasim Kadić.

Poslije diskusije predsjedavajući je Prijedlog zakona dao na glasanje.

Od 33 prisutna za je glasalo 18 poslanika, 10 je glasalo protiv, a 5 se uzdržalo.

Prilikom glasanja po entitetima 10 poslanika sa prostora RS glasao je protiv.

Predsjedavajući je konstatovao da prijedlog zakona o izmjenama i dopunama Zakona o putnim ispravama nije usvojen.

Ad – 8: Prijedlog odluke o utvrđivanju kompleksa zgrada i zemljišta za smještaj institucija BiH, o njihovom statusu, uslovima i načinu korištenja

Predsjedavajući dr Halid Genjac je podsjetio da je Prijedlog ove odluke bio na usaglašavanju na Komisiji Kolegija, te da se Komisija nije usaglasila da se u nazivu Prijedloga odluke naznači da se radi o zajedničkim institucijama BiH, pa je predloženo Vijeću ministara da se o navedenom izjasni. Konstatovao je da do početka sjednice nije stiglo izjašnjenje Savjeta ministara.

Gospodja Branislava Jovanović je u ime klubova srpskih poslanika iz RS podnijela amandman na tačku 9. Prijedloga odluke.

Predsjedavajući je potom upoznao poslanike o kojim izmjenama Prijedloga odluke je postignuta saglasnost, uključujući i amandman koji je podnijela g. Jovanović.

U ime Vijeća ministara g. Neven Tomić je iznio mišljenje Vijeća o amandmanima.

U daljoj diskusiji su učestvovali Abdurahman Malkić, Rasim Kadić i Neven Tomić.

Poslije diskusije predsjedavajući je konstatovao da je Vijeće ministara prihvatio amandmane na Prijedlog odluke i da su isti postali sastavni dio Prijedloga. Zatim je Prijedlog odluke dao na glasanje.

Odluka o utvrđivanju kompleksa zgrada i zemljišta za smještaj institucija BiH, o njihovom statusu, uslovima i načinu korištenja usvojena je jednoglasno (sa 32 prisutna poslanika).

Ad - 9: Prijedlog odluke o utvrđivanju statusa zgrade i zemljišta u Ul.M.Tita 25. i uslovima i načinu za njihovo korištenje

O Prijedlogu odluke nije bilo diskusije.

Sa 31 glasom ZA i jednim uzdržanim Odluka je usvojena.

Ad - 10: Davanje saglasnosti za ratifikaciju sporazuma'...

Predsjedavajući je podsjetio poslanike da su dobili izvještaj Komisije za finansije i Budžet o razmatranju sporazuma koji se razmatraju u okviru ove tačke dnevnog reda.

U diskusiji je učestvovala g. Suada Muminagić.

Poslije diskusije Predstavnički dom se prvo izjasnio o prijedlogu zaključaka koje je iznijela g. Muminagić, a koji su podržani i u izvještaju Komisije.

Sa 25 glasova ZA i 3 uzdržana, Dom je usvojio sljedeće zaključke:

1. da Vijeće ministara pripremi program aktivnosti na izvršavanju obaveza preuzetih na Donatorskoj konferenciji i da ovaj dom iz tog programa preuzme u svoj program rada obaveze koje se odnose na zakonodavnu i druge obaveze iz njegove nadležnosti.
2. da Vijeće ministara prati i redovno informiše Parlament, a najmanje jedanput polugodišnje, o realizaciji ovih kredita, kao i drugih koji se koriste po osnovu odluka donatorske konferencije.
3. Vijeće ministara treba da dostavi Predstavničkom domu informaciju o ukupnom zaduženju Bosne i Hercegovine.

/Vidjeti izvještaj Komisije/

Poslije usvajanja zaključaka predsjedavajući je konstatovao da su nadležne radne komisije Doma razmatrale sporazume, te da ima prijedloga da se o svih šest sporazuma glasa u paketu.

Sa 29. glasova (jednoglasn) Predstavnički dom je dao saglasnost za ratifikaciju:

- a) Sporazuma o razvojnom kreditu za projekat osnovne zdravstvene zaštite između BiH i Medjunarodne asocijacije za razvoj,
- b) Sporazuma o razvojnom kreditu za Pilot-projekat lokalnog razvoja između BiH i Medjunarodne asocijacije za razvoj,
- c) Sporazuma o razvojnom kreditu za prilagodjavanje u privatizaciji preduzeća i banaka, između BiH i Medjunarodne asocijacije za razvoj,
- d) Sporazuma o razvojnom kreditu za strukturalno uskladjivanje javnih finansija između BiH i Medjunarodne asocijacije za razvoj,
- e) Sporazuma o razvojnom kreditu za projekat podsticanja izvoza peduzeća između BiH i Medjuanrodne asocijacije za razvoj i
- f) Sporazuma o razvojnom kreditu za Pilot-projekat kulturnog nasljedja.

Ad - 11: Prijedlog zaključaka o djelokrugu radnih komisija Predstavničkog doma, rokovima i prisustvu predstavnika predlagača

Predsjedavajući dr Halid Genjac je dao uvodne napomene povodom Prijedloga zaključaka i naglasio da su poslanici dobili izvještaje radnih komisija o razmatranju Prijedloga zaključaka, a zatim je dao na glasanje te izvještaje.

Poslije glasanja predsjedavajući je konstatovao da je Dom prihvatanjem izvještaja radnih komisija prihvatio izmjene, odnosno amandmane na prijedlog zaključaka, pa je sa takvom konstatacijom Prijedlog zaključaka stavio na glasanje.

Zaključci su usvojeni jednoglasno.

Nakon usvajanja zaključaka dr Halid Genjac je predsjedavanje Domom ustupio mr Mirku Banjcu, koji od narednog dana preuzima predsjedavanje Predstavničkim domom.

Ustupajući dužnost predsjedavajućeg dr. Genjac je zahvalio svima na saradnji i poželio ubuduće još bolju saradnju i veću efikasnost u radu Predstavničkog doma Parlamentarne skupštine BiH.

Preuzimajući dužnost predsjedavajućeg Predstavničkog doma mr Mirko Banjac je zahvalio dr Halidu Genjcu na uspješnom vodjenju Doma i izrazio želju da će zajedno učiniti dovoljno da bi u buduće bili zadovoljni.

Zatim je g. Banjac dao riječ dr Jadranku Prliću, ministru inostranih poslova BiH, koji je Domu podnio informaciju u vezi organizacije Samita Pakta o stabilnost za Jugoistočnu Evropu.

Ad - 12: Poslanička pitanja

Poslanik g. Ana Havel je postavila pitanje - Dokle je došla istraga, da li su utvrđeni inicijatori, nalogodavci i izvršiocu atentata na pokojnog Jozu Leutara?

G. Nikola Špirić je postavio pitanje - Kako Vijeće ministara misli zaštititi privredne subjekte iz oba entiteta od zloupotreba imena firmi, robnog žiga, znaka, porijekla proizvoda i sl.?

G. Ibrahim Spahić je postavio pitanje - Kako Vijeće ministara misli da organizuje zdravstvenu zaštitu stanovništva BiH kad je riječ o uvozu onih roba iz svijeta koje danas ugrožavaju dobar dio Evrope i Svijeta?

Drugo pitanje g. Spahića je bilo - Da li je Vijeće ministara pripremio prijedlog zakona o autorskim pravima i da li će se staviti u skupštinsku proceduru.

G. Branislava Jovanović je iznijela problem parkiranja automobila kojim poslanici dolaze na sjednice.

Na pitanje g. Jovanović odgovorio je g. Vedran Hadžović, član Sekretarijata.

Na kraju sjednice mr. Mirko Banjac je dao za poslanike obavještenja vezano za organizovanje okruglog stola u Tuzli 21. i 27. 07. t.g. na temu "Ustavne pretpostavke za regulisanje izbora u Bosni i Hercegovini".

Takodje je mr. Banjac predložio da Kolegij odredi delegaciju Doma koja će posjetiti poslanika Ivu Mijačevića, koji je teško bolestan.

Sedmu sjednicu g. Banjac je zaključio zakazivanjem sastanka Kolegija za utorak, 20. jula 1999.godine.

Sjednica je sa radom završila u 19,30 sati.

Sastavni dio ovog zapisnika je magnetofonski snimak Sedme sjednice Predstavničkog doma.

**PREDSJEDAVAJUĆI
PREDSTAVNIČKOG DOMA
Dr. Halid Genjac**